

समै – 12:25 hrs.

<><><><><><>

### LG-Meeting

उपराज्यपाल मनोज सिन्हा होरें कल राजभवन श्रीनगर च पुलस ते सिविल प्रशासन कन्नै इक उच्ची सतह दी बैठक लाइयै हालात दी समीक्षा कीती। उनें उजाला सिगनस ते S.M.H.S अस्पतालें दा बी दौरा कीता ते उत्थै दाखल नौगाम पुलस स्टेशन धमाके च घाऽल होए दे लोकें दा हालचाल पुच्छेआ। डॉक्टरें एल.जी होरें गी घाऽल मरीजें दी स्थिति बारे जानकारी दिती ते दस्सेआ जे उनेंगी इलाज दी हर मुमकिन ते बेहतर कोला बेहतर सुविधा उपलब्ध कराई जा करदी ऐ। उपराज्यपाल होरें अस्पताल प्रशासन गी निर्देश दिता ते मरीजें दे ईलाज च कोई कोर कसर नेई रौहनी लोड़चदी तां जे ओह सब्बे तौले शा तौले नरोए होई सकन।

<><><><><><>

### EX-Gratia

जम्मू-कश्मीर सरकारै नौगाम पुलस थाने च होए दे धमाके च जान मोआने आहलें दे परिवारें गी मुखमंत्री राहत कोष चा 10-10 लक्ख रपे दी सीधी सहायता ते गंभीर तौर पर घाऽलें गी 1-1 लक्ख रपे दी मदाद देने दी घोशणा कीती ऐ। इस घटना च 9 जनें दी मौत होई गई ही ते 32 घाऽल होई गे हे। मुखमंत्री होरें प्रभावित परिवारें कन्नै हमदर्दी प्रगट करदे होई सेहत मंत्री सकीना इतू होरें गी निर्देश दिता ऐ जे घाऽलें गी हर मुमकिन ते बेहतर कोला बेहतर इलाज दी सुविधा उपलब्ध करना यकीनी बनाया जा। तोआई, सेहत मंत्री सकीना इतू होरें

अस्पताल दा दौरा लाइयै घा-sलें दी डौल पुच्छी। तोआई, मुख्यमंत्री उमर अब्दुल्ला होरें आखेआ जे इस धमाके च नुकसान पुज्जे दे ढांचे दे बदले बनकदा मुआवजा प्रभावितें गी दिता जाहग ते सरकार इस कठन घड़ी च हर प्रभावित कन्नै खड़ोती दी ऐ।

<><><><><><>

### Jitender Singh Projects

प्रधानमंत्री हुंदे दफ्तरै च राज्यमंत्री ते कठुआ-उधमपुर-डोडा लोकसभा सीट थमां सांसद डॉ. जितेंद्र सिंह होरें कल अपने हल्के च प्रधानमंत्री ग्राम सड़क योजना तैहत 9 अरब 24 करोड़ 33 लख रपे दी लागत आहिलें सड़क परियोजनां दा नीह पत्थर रक्खेआ ते 86 करोड़ 77 लख रपे दी लागत कन्नै मुकम्मल कीते गेदिएं सड़कं दा वर्चुअल ढंगै नै उद्घाटन कीता। उआं उधमपुर जिले च लोअर सौंथन रोड थमां छन्नी मोड़ तगर जाने आहली ते 7 करोड़ 99 लख रपे दी लागत कन्नै तैयार कीती गेदी सड़कें दा उद्घाटन मंत्री होरें मौके पर कीता। उधमपुर-कठुआ-डोडा लोकसभा हल्के गी जम्मू-कश्मीर च प्रधानमंत्री ग्राम सड़क परियोजनाएं चा 60 प्रतिशत हासल होइयां न ते उधमपुर जिला, ग्रामीण सड़क विकास दे क्षेत्र च भारत दे त्रै अक्वल जिलें च शामिल ऐ। प्रधानमंत्री ग्राम सड़क योजना दा मकसद उनें सभनें ग्राएं तगर सड़कां पुजाना ऐ जित्थै अजें तोड़ी सड़क राबता उपलब्ध नेई ऐ।

<><><><><><>

### IED-Rajouri

सुरक्षाबलें कल सरहदी जिले राजौरी थमां इक्क आई.ई.डी बरामद कीता। इस इक नियंत्रित धमाके च तबाह करी दितता गेआ। आकाशवाणी जम्मू दे संवाददाता नै जानकारी दिती ऐ जे थन्नामंडी सब डिविजन दे अप्पर बंगई गां च होए दे धमाके करी इक मकान गी आंशिक तौर पर नुकसान पुज्जा ऐ। अधिकारियें मुजब इक सुरक्षा गश्ती दल गी इक घरै दे कोल आई.ई.डी थहोआ। उनें बम निरोधक टीम गी सददियै इक नियंत्रिक धमाका करियै इसी तबाह कीता।

<><><><><><>

### Satish-Khour

खेड्ढ मंत्री सतीश शर्मा होरें कल खौड़ विधानसभा हल्के च जारी विकास परियोजनाएं दा मौके पर जाइयै मुआयना कीता। अपने दौरे दरान मंत्री होरें खौड़ ब्लॉक च दतेयाल थमां गुजरैल तोड़ी 2 किलोमीटर सड़क परियोजना दा उद्घाटन कीता। एहदे अलावा उनें टिब्बी महल्ला अखनूर पलांवाला ते सीताराम मंदर-पंचैत मट्टू सड़कें दे जारी कम्मै दा बी निरीक्षण कीता। उनें निर्देश दिता कि कम्मै च तेजी आहिनयै इनेंगी मित्थे गेदे समें दे अंदर-अंदर तोड़ चाढ़ना यकीनी बनाया जा। इस दरान मकामी लोकें कन्नै गल्ल करदे होई उनें बेहतर सड़क राबते लेई तेजिया कन्नै कम्म करने ते हर कम्म च जवाबदेही तैह करने दा भरोसा दोआया।

<><><><><><>

### CS-Youth Engagement

मुख्य सचिव अटल डुल्लू होरें समूलचे केंद्र शासित प्रदेश च सांस्कृतिक, शैक्षणिक, उद्यमता सरबन्धी ते समुदायिक गतिविधिएं गी बढ़ावा देने दे मकसद कन्नै चलाए जाने आहले "युवा

सम्मिलित ते सशक्तिकरण कार्यक्रम गितै जारी तैयारिएं दा जायजा लैता। उच्ची सतह दी इक बैठका च अटल डुल्लू होरें तैयारिएं दे बक्ख-बक्ख पैहलुएं बारै जानकारी हासल कीती। बैठका च बक्ख-बक्ख जिलें दे डिप्टी कमिशनरें ते मैहकमें दे अध्यक्ष बी मौजूद हे। मुख सचिव होरें निर्देश दिता जे इस कार्यक्रम बारै तफसील ते तफसीली कार्ययोजना 15एं दिनें दे अंदर-अंदर एहदे पोर्टल पर चाढ़ी दिता जा। उनें आखेआ जे एहदे च शानदार सांस्कृतिक गतिविधिएं दे कन्नोकन्नी युवा सशक्तिकरण कार्यक्रमें, सरकारी स्कीमें दे बारै च जानकारी, जिला सतह पर नेइमा तालमेल बनाने ते इस पोर्टल गी माईगोव कन्नै जाइने गी बी तरजीह दिती जा तां जे पंचैत सतह तगर बी हर गतिविधि दी जियोटैगिंग ते दस्तावेजन होई सकै।

<><><><><><>

### Ramban-Sehkari Mela

रामबन च सहकारी समिति सहकारी गतिविधियें गी बढ़ावा देने ते मकामी चीजें-बस्तें लेई बजार तगर पुज्ज उपलब्ध करोआने ताई अपने सालाना सहकार मेले दा सरिस्ता करा करदी ऐ। इस मेले दा मकसद सहकारी स्कीमें बारै जागरूकता बढ़ाना, सिखलाई प्रदान करना ते करसानें गी बेहतर कीमतें पर जैविक उत्पाद बेचने ताई इक्क मंच उपलब्ध करोआना ऐ। एह आप सहायता समूहें गी गाहकें कन्नै सिद्धा जुड़ने दा बी मौका उपलब्ध करोआंदा ऐ। सामुदायिक विकास ते राष्ट्र निर्माण च सहकारी समितियें गी भूमिका गी उजागर करने आस्तै गल्लबात आहले सत्र ते नमैशें दा सरिस्ता कीता जा करदा ऐ।

<><><><><><>